



# ज्वजलपा वाःपौ

JWOJALAPA WEEKLY

दैं ७ ल्याः ८ (पूर्णडिक ११०) ने. सं. ११३६ यलाश्व दशमी आइतवाः २०७३ भाद्र २६ गते आइतवाः (Sep- 11, 2016)

मू ८।- पृष्ठ ६

## किपूया न्हापांम्ह पत्रकार लोकबहादुर डंगोल जूगु प्रमाणित

### तत्कालिन अवस्थाय् सरकारी पत्रकार जूगु प्रमाणपत्र



**ज्वजलपा वा:पौ /**

पत्रकारिता खल्य किपू ल्युने मला। थौकन्हय् तकं नेवाः भासं छगू ज्वजलपा वा:पौ, खय भासं वा:पौ कीर्तिपुर सन्देश, कीर्तिपुर दर्पण, सहिद, स्वर्णिम सन्देश पिहां वयाच्चंगु दु।

अले थौथी संचार माध्यमय् ज्या याना वयाच्चंगु दु किपूया पत्रकारपिं। म्हिगःया दिनय् तक किपूया सागाः त्वाःया ज्ञानबहादुर महर्जन हे किपू नगरया दकले न्हापांम्ह पत्रकार धकाः तायेका वयाच्चंगु खःसा आः वया


वयकःसिवें न्हयः हे किपू नगर दुनेया पाँगाया लोकबहादुर डंगोल पत्रकार जुयादीगु प्रमाणित जूगु दु।

ज्ञानबहादुर महर्जन २०२० सालय् “लू निभाः” साहित्यीक पत्रिका पिकयादीगु खःसा उकिं वयकःयात हे किपू नगरया दकले न्हापांम्ह पत्रकारया रूपय् नाला वयाच्चंगु खः। तर आः वया ज्ञानबहादुर महर्जनसिवें नीखुदें न्हयः हे पाँगाया लोकबहादुर डंगोल पत्रकार जूगु प्रमाणीत जूगु दु।

अबले वयकः निजी संचार माध्यमया पत्रकार जक मखु सरकारी संचार माध्यमया हे पत्रकारया रूपय् नियुक्ति जूगु दु। २००४ सालय् वयकःयात प्रमाणपत्र तकं बियातःगु दु। नेपाल सरकारया डाइरेक्टर जनरल अफ दि डिपार्टमेन्ट पब्लिसिती नेपालया डाइरेक्टर विजय शमशेरं बियातःगु प्रमाणपत्र लुयावःगु दु। उगु पतिइ खयभासं थुगु कथं

चव्यातःगु दु ‘ल.पु.इ, पांगा ढोकाफले टोल बस्ने ठाना अभिनी स. अ. ना. रा. लोकबहादुरलाई २००४ साल चैत्र मसान्त सम्मका निमित्त नेपाल सरकारद्वारा प्रकाशित गोरखापत्रको सम्पादाता नियुक्ति गरि यो प्रमाणपत्र दिने काम भएको छ। निजलाई कुनै नयाँ कुरो बुझ्ने तथा अड्डा अडालतको छलफल र सार्वजनिक सभामा भएको कुरा सुन्ने पूर्ण अधिकार छ।’

लोकबहादुर डंगोल पाँगा ढोखाफलया डिठ्ठा नरबहादुर डंगोलया तःधिकःम्ह काय खः। वयकःया जन्म वि.सं. १९७४ मंसिर ११ गते सोमवार पाँगाय् जूगु खः। वयकःया किजापिं रामचन्द्र डंगोल व भरत बहादुर डंगोल खः। पाँगाया शिक्षित परिवारय् जन्मय्जूपिं वयकःपिं तःधंगु पोस्तय् तकं थ्यंगु दु। रामचन्द्र डंगोल लेखा अधिकृततकं जुया दीगु दुसा



वयकःया किजा भरत बहादुर डंगोल नेपाल सरकारया सचिवतक जुयादीगु दु।

लोकबहादुर डंगोल ३४ स्वीप्यदंया नच्चागु वैशय् वि.सं.२००८ साल भाद्र १ गते शुक्रवार मन्त। थुलि नच्चागु उमेरय् न वयकलं पाँगाया निति यक्व ज्या याना वंगु खने दु। वयकलं आखः ब्वनेमाः धइगु नेपाल सरकारय् जागिर नयाः तःधंगु पोस्तय् तकं थ्यंगु दु। रामचन्द्र डंगोल लेखा अधिकृततकं जुया दीगु दुसा

गुकिं याना वयकःया कुतल वि.सं.२००४ सालं पाँगाय् जलविनायक स्कूल पलिस्था याना संचालक समितिया अध्यक्ष तकं जुयादीगु खः। अथेहे वि.सं.२००४ सालं हे शहिद स्मारक पुस्तकालय थःगु हे छैय पलिस्था यानादीगु खः।

वि.सं.२००४ साल भाद्र २३ गते लोकबहादुर डंगोलयात राजकाज मुद्दाय् ज्वनायंकाः राजबन्दीया रूपय् निर्दतक कुनाः हल। वि.सं.२००६ साल भाद्र २० गते जेलमुक्त जुल।

**पिदंगु दु  
स्वंगू सफू**

उपन्यास

ध्वया च्वंगु सः

न्वचू, उद्घोषण व एफ एम

संचालन कला नासः

चिनाखँ मुना ईब्यःया चिनाखँ



नजरराम महर्जनया भिंछगूगु उपन्यास 'ध्वया च्वंगु सः'

मू निसः तका जक



श्रीकृष्ण महर्जनया न्यागूगु सफू 'नासः'

मू न्यय् तका जक



नाति महर्जनया न्हापांगु सफू 'ईब्यःया चिनाखँ'

मू सच्छि तका जक

थःगु प्रति सुरक्षित यानादिसँ न्हि स्वापू

४३३३००७,  
९८४९४०९०७७





## अपर्णा प्रधानया खुगू सफू छकलं छगू हे दबुलिइ विमोचन



त:दँ न्ह्य:निसँ नेपालभाषा ख्यलय समालोचना, च्वसुमुना व बाखंमुना याना: नेपालभाषाया न्हयगु ७ सफू पिथनादी धुंक्कू अपर्णा प्रधान आ: उपन्यास विद्याय नं पिल्ला:गु दु ।

मिहग: ने.सं.११३६ यंलाख नवमि सनिवा: (भाद्र २५) गते छगू हे दबुली वयक:या खुगू सफू छकलं उलेज्या जुल । प्रा.प्रेमशान्ति तुलाधरया मूपाहाँसुइ जूगु उगु ज्याभवलय वयक:या समालोचना सफू -स्वदुवा:, निवन्ध मुना - पुण्यभूमि नेपाल व प्यंगु उपन्यास १.मां, २.लुमन्ति ३.खग्रास मुक्तगु मिला, ४.सुमन याना भिंघ: भव्यछँ हलय विमोचन जूगु ख: ।

ने.सं.१०६७ गुंलागा १४ य किलाग: ये मां मथुरादेवी व बौ रामभक्त प्रधानया कोखं जन्म जुयादीमह वयकलं नेपालभाषाय एम.ए.पास यानादीगु दु । वयकलं रेवतीरमानन्द श्रेष्ठ धार्मिक लेख सिरपा, ठाकुरलाल सिरपा: व जरिमैया सिरपा नं कयादी धुंक्कू दु । जीवनया ७० दँयं य्यनेधुंका: नं वयक:या च्वसू थुलिमछि छकलं पिदनेगु धैगु वयक:या साहित्यप्रति अनुरागया दसू ख: । अले सुं नं मिसाया ल्यूने सुं मिजंया ह:पा दइ धा:थे भिंखुदँया वैशय इहिपा यानादीमह वयक:या जहान भाजु शान्तवर प्रधानया ह:पा च्छय्ये बह:जू । थुगु खुगु सफूया पिकाक: नं वयक:या जहान शान्तवर प्रधान हे ख: । वयक:या मेमेगु न्हापा हे पिदने धुंक्कू सफूत थये दु १.भिंच्याफव: स्वां (च्वसुमुना, ने.सं.११२५) २. स्वयंनगु (बाखंमुना, ११२७), ३.ज:या ज: (समालोचना मुना, ११२९) ४.कृत: (समालोचना ११३०, ५. भावना (निवन्ध मुना११३०), ६. ईया बाखं (बाखंमुना ११३०) ७. नील: (बाखंमुना ११३१) अथे हे पिदने मानिगु निगु उपन्यास सफूत नं दिन १.लायलामा व ल्यासे अजि । थुगु कथं नेपाल भाषा उपन्यास ख्यलय न्हापांमि मिसा च्चमि शशिकला मानन्धर ख:सा आ: अपर्णा प्रधानं नं उपन्यास च्चमि मिसाया नां धलखय थ:गु नां नं दुय्याका दीगु दु ।

## सुरक्षा सचेतना सप्ताह हनीगु बारे सहलह



सामुदायिक सेवा केन्द्र किपू, महानगरीय प्रहरी वृत्त किपू व किपू नगरपालिकाया मंका: ग्वसालय किपुली असोज १ गतेनिसँ ७ गतेतक सुरक्षा सचेतना सप्ताह हनीगु जूगु दु ।

मिहग: भाद्र २५ गते हिलसाइड होटल किपुली जूगु छलफल तथा अन्तर्क्रिया ज्याभवलय उगु जानकारी बियादीगु ख: । सामुदायिक सेवा केन्द्र: किपूया नायो रविन्द्रबहादुर प्रधानया नायोसुइ जूगु उगु ज्याभवलय डिएसपि डा.मेखबहादुर खत्री लसकुस न्वचु बियादीगु ख: । वयक:या लसकुस न्वचु लिपा थ:थ:गु बिचा: तयेत फ्लोर अपन या:बलय भिंन्यामहेसँ थ:थ:गु बिचा: तयादीगु ख: । अथे हे र जर्नातिक संयन्त्रया प्रतिनिधिपिन्सं नं बिचा: तयादीगु ख: ।

अन बिचा: व:गु स्वयेवलय किपू नगरपालिकाया ज्यां सुं नं जनता सन्तुष्ट मजगु खनेदत । किपू नगरपालिका धइगु किपू, नगां व पाँगा जक जूगु मेमेगु वडाया नं थुज:गु ज्याभव: यायेमा:गु व सकसित नं मुंका: यनेमफुगु खँ पिहाँवल । अथेहे थौंकन्हय सोलार मत तयेगु खँय धेवा दुपिनिगु वडाया जक मत च्यात । धेवा तयेमफुपिनिगु वडाया खिउँक हे च्वना च्वनेमाल धका: नं खँ वल । अथेहे अन छुं दिं न्ह्य: लहनाय प्रहरी छपा मारय या:गु खँय नं समर्थ व विरोधया स: पिज्वल । विरोधयाइपिनिंसं लहनाय जक मखु छँय छँय हे छपा मारय याना: अय्ला थँ नस्त यायेमा:गु मांग नं त:गु खनेदत । थ्व मांग गैर नेवा: नं त:गु ख: । तर थुकिया लिस: ९५ प्रतिशत नेवा:त सहभागि दुगु उगु मुंज्याय सुं नं नेवा:नं त:जिक तयेमफुत । छुं नेवा:त प्रहरीत नेवा:तयगु छँय छँय वया: अय्ला थँ मातु माला नस्त या:सां जिउ धइगु मौन स्वीकृत बिउगु ख:ला धका: नं अन हुइना भुइना जुल । डिएसपि डा.मेखबहादुर खत्री संस्कृतिया नामय व्यापार मयाकेगु थ:गु अठोट हानं न्ह्यव्वयादिल ।

## किपूया मङ्गल स्कूलया सामाजिक लेख परीक्षण

ज्वलला वा:पौ

किपूया नयाँबजारय च्वंगु मङ्गल उच्च मा.वि. मिहग: शनिवार छगू ज्याभव:यासँ आ.व. २०७२/०७३ या सामाजिक लेखा परिक्षण न्ह्यव्वल ।

थ:गु हे सभा हलय लेखा परिक्षण समितिया संयोजक चक्रवहादुर विष्टया सभानायोसुइ जूगु उगु ज्याभव:या मूपाहाँ प्रा.डा. शिवशरण महर्जन, पाहाँपिं की.न.पा. ३ वडाया सचिव विजय सुवेदी, विद्यालय व्यवस्थापन समितिया अध्यक्ष सूर्यमान रजित, नि.प्राचार्य लोकलाल महर्जन, सहायक प्राचार्य निलकण्ठ महर्जन, सामाजिक लेखा परिक्षण समितिया सदस्यपिं भोलानाथ खनाल, रुस्तम काफ्ले, प्रतिक्षा

देवकोटा लगायत मेमेपिं नं पाहाँपिं दुगु ख: । लसकुस न्वचु भोलानाथ खनालं बियादिल । वार्षिक प्रतिवेदन नि.प्राचार्य लोकलाल महर्जन न्ह्यव्वयादिल ।

वयक:या प्रतिवेदन कथं कक्षा १ निसँ ८ तक विद्यार्थी ल्या: ५४२, कक्षा ९ निसँ १२ याना: ३८९ विद्यार्थी दुगु खँ कनादिल । थुगुकथं कक्षा १ निसँ १२ तक ९३१ विद्यार्थी दु । अथे हे स्थायी अस्थायी प्रा.वि.निसँ मा.वि.तक शिक्षकपिं ३३ म्ह दुगु नं न्ह्यव्वया दिल ।

सहायक लेखापाल बिना महर्जनं लेखा प्रतिवेदन न्ह्यव्वयादिल । वयक:या प्रतिवेदन कथं उगु स्कूलय दच्छिया रु.१११९५७४९ तकाया आय व्यय जूगु दु ।



## नगां ज्ञानमाला भजन खल:या भिंगुक्व:गु दँ मुंज्या

बुद्ध धर्मया प्रचार प्रसार यायेगु तातुना: किपूया नगामय पलिस्था यानात:गु नगां ज्ञानमाला भजन खल: नं मिहग: थ:गु भिंगुक्व:गु दँ मुंज्या त:जिक हन ।

नगामय च्वंगु वाघभैरव वैक्वेटया हलय खल:या नाय: वेखालाल महर्जनया मूपाहाँसुइ, मूपाहाँ भिक्षुणी अनोजा गुरुमां नं बोधिमत च्याका: उलेज्या यानादीगु ख: । लसकुस न्वचु उपाध्यक्ष भिमसेन महर्जनं बियादीगु । लसकुस म्ये ज्ञानमाला भजन खल: नगांया ज:दुज:पिन्सं मंका: हालादीगु ख: ।

चण्डेश्वर महर्जनं न्ह्याका दीगु उगु ज्याभवलय बुद्धा सेवा समिति नाय: हीरा डंगोलं नगां ज्ञानमाला भजन खल:नं याना वयाच्वंगु ज्या अले वहे अन्तर्गत बुद्ध सेवा समितिं याना वयाच्वंगु ज्याखँ न्ह्यव्वयादिल । उगु हे ज्याभवलय खल:या आजीवन सदस्यपिन्त दसिपौ इनेगु ज्या नं या:गु ख: ।

नगां ज्ञानमाला भजन खल:या वार्षिक प्रतिवेदन सचिव वेखाराम महर्जन व आर्थिक प्रतिवेदन कोषाध्यक्ष विश्व राज महर्जनं न्ह्यव्वयादीगु ख: । धन्यवाद न्वचु उपाध्यक्ष अष्टवहादुर महर्जनं बियादीगु ख: । अथे हे भिन्तुना न्वचु पाहाँपिं रमानाथ श्रेष्ठ, रमना श्रेष्ठ, कीरण कुमार जोशी, व मूपाहाँ डा. अनोजा गुरुमां नं थ:थ:गु नुग: खँ प्वंका दीगु ख: । अध्यक्ष वेखालाल महर्जनं सभा वचायेका दिल । अनं लिपा पाहाँ रमानाथ श्रेष्ठ ज्येष्ठ नागरिकपिन्त हनादीगु ख: ।

ज्याभव: सुरुजुइ न्ह्य: व वचायेका तकं थीथी ज्ञानमाला भजन खल:पिन्सं भजन न्यंका: दीगु ख: ।



## उद्योग मन्त्री नबिन्द्र जोशीयात सगं

### ज्वजलपा वा:पौ

शुक्रवा: येँया धुम्बाखेलय धुम्बाखेल मिसा पुच:या ग्वसालय उद्योग मन्त्री नबिन्द्रराज जोशीयात सगं विउगु दु । मन्त्री नेवा: मखुसां नं नेवा: परम्परा कथं वय्क:यात खें सगं विया हनेज्या या:गु ख: । ज्याभव:या सभापति मिसा: पुच:या नाय: शुसिला प्रधान शाही जुयादिगु ख:सा पाहाँ कथं सांसद राज्यलक्ष्मी श्रेष्ठ, धुम्बाखेल टोल सूधार समितिया नाय: निदेश शाही, नापं थीथी व्यक्तीत्वपिं जुयादीगु ख: । मन्त्रीपाखें धुम्बाखेल मार्गय् च्वंगु ब्वलं सियात:गुयात उलेज्या यानादीगु ख: । अथे हे धुम्बाखेल:या खानेपानी ट्यांकीया ता:चा: मिसा पुच:यात मन्त्री ल:लहानादीगु ख: ।

ज्याभवलय मन्त्री जोशीपाखें धुम्बाखेल त्वा:या सच्छि व प्यदं दुम्ह थकालि बिल बहादुर शाहीयात सताब्दी पुरुष पदवि हंगु ख:सा उगु लागाय् वंगु स्वंगू दशक न्हय:निसें समाजसेवा व उद्योग संचालन याना वयाच्विपिन्त नं हंगु ख: ।

उद्योगमन्त्री जोशी मुलुकय् बन्द जुयाच्वंगु उद्योगयात संचालन फुसा सरकारं याइ मखुसा जनतायात सहभागीता याका न्हयाकेगु जुइ धयादिल ।

## सक्वय् देवी प्याखं

### ज्वजलपा वा:पौ

शुक्रवा दँयदसं थें थुगुसी नं सक्वय् देवि प्याखं क्यंगु दु । काया अष्टमी खुन्हु सक्वय् नास: पुजायाना न्ह्याकीगु देवि प्याखं पिथनेत सक्वया बज्रयागिनि गुँविहारय् कल: पुजा वना घ:यागु किकिंका स्वपा ब्वकया हया देविपित तिसां तिकेगु भवलय् छयनय् छुइकेगु चलन दु । सक्वया गुँविहारय् च्वम्ह घ:यात त्रीदेवि कथं नाला वयाच्वंगु दुसा थुगु प्याखं व हे देवीया प्याखं कथं न्हयाका वयाच्वंगु ख: । थुगु जात्राय् न्यादँय् छक: न्हूपिं प्याखंम्व:पिन्त स्यनेमा:गु नियम दु ।

सक्वया देवि प्याखनय् देवि, चण्डी व भैरव कथं प्याखंम्व: दइसा ख्या: ,कवं व वेता: स्वम्ह नं प्याखं म्व: दु । थुगु प्याखनय् दानवसुरपिन्त स्याइगु अभिनय् याइगु जूसां नं दानव पात्र धा:सा दैमखु । दैत्ययात स्याइगु दबुली भाय् याना खड्गं पालिगु लू जक क्यनीगु चलन दु । थुगु प्याखं मालश्री म्येया धुनय् ल्हुइकेगु याइसा उखुन्हुनिसें सक्वय् च्वंगु थीथी भजनय् मालश्री हालेगु म्ये हालेगु याइ । थुगु जात्राय् दक्कय् न्हापां त्वा: गणेघ:या न्हय:ने घ:लहाना महालक्ष्मी देविया देग:या न्हय:ने प्याखं क्यनेगु याइ । थुगु प्याखं सक्वया च्यागु त्वालय् च्वंगु दबुइ ल्हुइकीमा:गु चलन दु ।

## पिलाछें पुन: निर्माण

### ज्वजलपा वा:पौ

त:भुखाचं क्षति या:गु यलया पिलाछें त्वा:यात पर्यटन प्रवर्द्धन यायेगु आज्जु तया पिलाछें पुन:निर्माण तथा पर्यटन प्रवर्द्धन परियोजनापाखें पुन: निर्माणया ज्या न्हयाकाच्वंगु दु ।

पुन:निर्माणया ज्याभव: कथं पिलाछें पुन: निर्माणया शनिवा: पि आर वि नम्बर ५ या सूर्यलाल महर्जनया छेंया नितजा:गु ढलान ।

फि क्रीकत स्वयंसेवकतय्सं ल्हयाया ननिइ तयेयकेगु ज्या जूगु दु । अथे हे अप्पा नं मिलेया:गु ख: । स्थानीय मन्त, माया फाउण्डेशनया नाय: रमेश महर्जन नापनापं थीथी संघसंस्था व्यक्तीपिंगु श्रमदान कथं ढलान या:गु ख: ।

च्ययनिखा छें नेवा: पह: वयेक ब्रजया प्रयोगयाना दयेकेगु आज्जु तया ज्या न्हाकाच्वंगु ख: । नेपा: देय् दुने हे नमुना कथं याइत्यंगु थुगु आयोजनायात पूर्वकेत ५० करोड दां मा:गु अवस्था दु ।

माया फाउण्डेशनया पहलय् थीथी संघसंस्था, समाजसेवी नापनापं स्थानीय मन्तयगु आर्थिक नापं श्रम ग्वाहालिं थुगु योजनायात न्हयाकाच्वंगु ख: ।

## सुनागूया पीसी

### ज्वजलपा वा:पौ

शौकन्हय् नेवा:तय्गु वस्ती वस्तीइ पीसी वनेगु चलन दु । बहनी बहनी पीगं घ:याथाय् वनीगुयात हे पीसी वनेगु धाइगु ख: । ख्व हे दथुइ यल जिल्ला दुनेया नेवा: वस्ती सुनागू लागाय् काया अष्टमी शुक्रवा:निसें पीसी वनेगु सुरु जूगु दु । बहनी त्वा: वस्तीयापिं सकलें मुना सांस्कृतिक बाजं सहित वनीगु ख: । काया: अष्टमी खुन्हुनिसें पीन्यान्हु तक थुगु कथंया यात्रा न्हयाकीगु चलन दु ।

पीसी वनीगु भूवलय् वस्ती पिने पीगनय् अथे पुजा वनीगु ख: । धिमे बाजं थाना सांस्कृतिक पर्वया रुपय् वनीगु इलय् मिसापिन्सं घ: पतिकं मत विया वनीगु चलन दु । पीगनय् वना घ: भागी याना चा:हिला: हाकनं देसय् वया गुलि नं घ:दु इमित मत विया वनीगु चलन दु । पीसी वनेगु नितिं दँय दसं पा: पा: काइगु ख: । पीसी वनीगु चलन इलय् ब्यलय् बन्द जुया संचालन याना वयाच्वंगु ख: । लिपांगु इलय् खुदीसवे अप्प: बन्द जुया थुगुसी हाकनं पीसी वनेगु सांस्कृतिक ज्याभव: न्हया:गु ख: । थुगुसी उत्तुभवल त्वा:या विश्वकर्मा कोषपाखें थुगुसीया पीसी वनेगु ग्वसा: ग्व:गु ख: । मदये धुंकीपनिगु नामं मत विया वनेगु नापं इमिगु आत्मायात शान्तिया कामनायासें उगु कथं मत पीसी वनीगु चलन दु धका: धाइगु चलन दु ।

## फँपिइ बासुरी कासा

### ज्वजलपा वा:पौ

ऐतिहासिक नापं सांस्कृतिक रुपं महत्वपूर्ण नेवा: वस्ती फँपिइ न्हापांगु राष्ट्रिय स्तरया बासुरी बाजा धेधेबल्ला कासा जूगु दु । दक्षिणकाली नगरपालिका दुने ला:गु नेवा: वस्ती फँपिइ उगु कथंया कासा जूगु ख: । शनिवा: सिचाइ मन्त्री दिपक गिरीं उलेज्या यानादीगु ख: ।

वा वयाच्वंगु अवस्थाय् जूगुलिं दबुलिइ धा:सा पाहांपिनिगु नितिं पालया व्यवस्था यानात:गु ख:सा सर्व साधारणया नितिं पाल मदया वां दयेका व कुसां कया च्वनेमा:गु अवस्था व:गु ख: । दबू जायक पाहांपिं च्वना जूगु भब्यगु समारोहलय् येँ निर्वाचन क्षेत्र नं. १० या सांसद राजन कुमार केसी नापं थीथी व्यक्तीत्वपिन्सं न्ववानादीगु ख: ।

अथे हे मूपाहां सिचाइ मन्त्री दिपक गिरीं नं न्ववानादीगु ख: । औपचारिक ज्याभव: क्वचाये धुंका: बासुरी धेधेबल्ला कासा जूगु ख: । कासाय् स्वनिग:या ख्वप, यल, येँ नापं थाय् थासं ब्वति का:गु ख: । कासाय् सहभागी खल: पुच:तपाखें नेवा: वस: पुना बासुरी ब्वज्या याना थ:थ:पिनिगु कला प्रस्तूत या:गु ख: ।

## अर्थमन्त्री हाकनं चीनपाखे

### ज्वजलपा वा:पौ

उपप्रधानमन्त्री नापं अर्थमन्त्री कृष्णबहादुर महारा शनिवा: आकाभाकां चीन वनादीगु दु । तिब्बतय् जुइगु छगू ज्याभवलय् ब्वति कायेत शनिवा: सुथय् वय्क: उखेपाखे वनादीगु ख: । असोज महिनाया न्हापांगु वालय् जुइगु घयात:गु चिनियाँ राष्ट्रपति सि जिनिपिडया नेपा: भ्रमण स्थगित जूगु खबर सार्वजनिक जुइवं हे भ्रमणयात सुनिश्चित यायेत वय्क: उखेपाखे वानदीगु खयेमा: धका: अनुमान या:गु दु ।

## शान्तिमन्त्रीयात सम्मान

### ज्वजलपा वा:पौ

सिद्धान्त व निष्ठाया राजनीति मूल्य मान्यतापाखें देय् विकासय् महत्वपूर्ण योगदान विउगु बापत शान्ति नापं पुन: निर्माणमन्त्री सीतादेवी यादवयात सम्मान या:गु दु । येँया मोर्डन कन्या मल्टिपल कलेजया भिक्व:गु दँमुंज्याया लसताय् मन्त्री यादवयात सम्मान या:गु ख: ।

नारी शिक्षाय् मुलुकय् हे उदाहरणीय भूमिका म्हिता व:गु उगु कलेजय् शौकन्हय् मानविकी व व्यवस्थापन सङ्कायलय् स्नातक तहतक व्कावया च्वंगु दु । समारोहयात सम्बोधन यासें मन्त्री यादवं द्वन्द्वपीडितया व्यवस्थापन व दुनाच्वंगु संरचनाया पुन:निर्माणयात थ:म्ह आश्वासनय् जक सीमित मया:से ज्या याना हे क्यनेगु धयादिल ।

पूर्वमन्त्री निलाम्बर आचार्य, सांसद नारायण कार्की, शिक्षाविद् विद्यानाथ कोइराला लगायतया व्यक्तितय्सं मिसापिनिगु शिक्षा बारे थ:थ:या विचा: प्कादिगु ख: ।

## द्वन्द्वपिडितया माग

### ज्वजलपा वा:पौ

द्वन्द्वपिडित सुरक्षाकर्म परिवारं सरकारयात न्हय्गु बुँदाया माग त:गु दु । शनिवा: रिपोर्टसं क्लब नेपालय् पत्रकार सम्मेलनयासें संघं सम्मान व पहिचान जुइक पिडितया परिभाषा यायेमा:गु, शहिद घोषणा यायेमा:गु, विभागिय नियम कथं कायम जूगु सुरक्षाकर्मिया अशक्तता प्रतिशतयात दक्व: निकायं माने यायेमा:गु, आर्थिक सहायता नीगु लख विइमा:गु, जीवन विमा भिगु लख विइमा:गु लगायतया न्हय्य्गु बुँदाया मागत त:गु ख: । सरकारय् दूगु अवसरय् शान्ति मन्त्रालययात माओवादी केन्द्रया पासापिन्सं व कर्मचारीं थ:गु पार्टीया कार्यालय थें जा:गु व्यवहार व भेदभाव या:गु द्वपं विउगु दु । थ:या मागत ज्वनां प्रधानमन्त्रीयात नापलायत लच्छी न्हयव:निसें ई माग यानागु जूसा थ:यात ई मदु धका लिछुवईगु गुनासो प्कादिल । द्वन्द्वकालिक अवस्थाय् सुरक्षाकर्म व माओवादी दथुई स्वईगु मिखा माओवादी सरकारय् दुबलय् नं अथेहे जूगु थे ता:गु द्वपं वियादिल ।

## भलनाथ खनाल

### ज्वजलपा वा:पौ

नेकपा एमालेया वरिष्ठ नेता भलनाथ खनाल पार्टीइ गुटबन्दी त:धंगु समस्याया रुपय् व:गु धयादिल । थुकिं एमालेयात विभाजनया लँपुइ यंकी धयादिसें वय्कलं कार्यकर्तायात सतर्क जुइत आह्वान यानादिल । शनिवा: येँ जूगु ज्याभवलय् न्ववासे नेता खनाल पार्टी स्थायी समितिं तकं गुटबन्दी समस्या जूगु स्वीकार या:गु धयादिल । वय्कलं सुनां कोथाया अधिवेशन याइ धा:सा व गलत जुइगु धारणा तयादिल । वय्कलं स्वंगू हे निर्वाचन जुइगुलिइ तकं संका यानादिल ।

## कर्णालीया जनतातपाखें प्रचण्डया घोषणायात कया आपत्ति

### ज्वजलपा वा:पौ

वंगु बिहीवा: प्रधानमन्त्री पुष्पकमल दाहाल कर्णालीइ मन्त जन्म जुइबलय् नीगू किलो व सीबलय् नीगू किलो जाकी बिइगु धका: संसदय् या:गु घोषणाप्रति कर्णालीवासीत आक्रोशित जूगु दु । शनिवा: कर्णाली जलाधार मञ्च येँया संवाद डबलीइ या:गु पत्रकार सम्मेलनय् वक्तातय्सं नीगू किलो जाकी बिइगु घोषणा तत्काल लित कायेत माग या:गु दु । नीगू किलो जाकी बिइगु प्रधानमन्त्रीया घोषणां थ:पिन्त अपमानित व अपहेलित या:गु धासं घोषणा जूबलय् निसें कर्णालीया बासिन्दां विरोध या:गु

दु । जलाधार मञ्चया अध्यक्ष प्रकाश रोकायां शासकतय्सं कर्णालीयात पुर्खानिसें हे उपेक्षित व गोठालाया व्यवहार वयाच्वंगुलिइ वसिं वय्यया व्यवहार प्रधानमन्त्री दाहालं यातधासं घोर आपत्ति प्कादिल । आत्मनिर्भरताया नितिं कर्णालीया बासिन्दा अझ मा:सा बलिदान बिइत तयार दूगु धासें अपमानजन्य घोषणा लितकायेकेत कर्णालीया जनतां संघर्षया ज्याभव: तयार याये धुंकीगु धयादिसें प्रधानमन्त्रीं घोषणा लित मका:से भारत भ्रमणय् वनादिल धा:सा सरकारयात तसकं थाकुइ धका: ख्याच्व: वियादिल ।





## अन्धविश्वासय् लिकुनाच्वंगु विज्ञान

### बालि बांलातकि मभिं

थीथी ज्या मध्ये बालि यायेगु नं छगू ज्या खः। फयाफक्व अप्ठः सयेकेगु बालि यायेगुया तातुना जुइ।

बाली अप्ठः सयेकेगु हे बालि बांलाकेगु खः। थ्वया लागि बुज्यामिपिसं यक्व मिहेनत याइ। गथे याना: अप्ठः सयेके धयागु धन्दा कया: याइ। थुकथं धन्दा कया:यागु बालि नं यक्व बांलात बाय् यक्व सल धायेव दसांकइ, मभिं धायेगु चलन दु। थ्व चलन सय्वालीयात कया: धायेगु याइ।

उबलय् बालिनालि याइवलय् वैज्ञानिक तरिकां आधुनिक लवःकवः छ्यला: यायेगु चलन मद्दु। थी थी कथंया बासः व रसायनिक सा: नं तयेगु मद्दु।

क्ववयेकातःगु (अर्गानिक) सा: तयेगु व घरेलु वासलं उपचार याइ। संरक्षण संवर्धनया लागि नं आ:थें थीथी

उपकरण मद्दु। दक्वं प्राकृतिक वातावरणनाप आधारित जुया: यायेमा:। मौसम अनुकुल जुल धा:सा बालि बांलाई, प्रतिकूल जुल धा:सा स्यनी। गबलें गबलें मौसम अति बांलाना बालिनालिया लागि तसकं अनुकुल नं जुइ यः। थज्यावलय् बालि यक्व बांलाना: फसल नं अप्ठः दइ।

बालि बांलात धायेवं मभिं, दसां कइ धाइगु अप्ठः याना: तुसि, फसि व आलु आदि सय बालियात कया: धाइगु खः। थ्व बालि: पाक्य जुइगु बखत धयागु चैत्रनिसें असार तकया दुने ला: वः। थ्व बखतय् वाफय् वयेगु व भवालापालां वा नं वयेयः। बुईसःगु बालि बुईतुं सचय् यानातयेगु थाय् दयाच्वनी मखु।

छें हे यंके माली बाय् मीयंकेत वजारय् ल्हेया यंकेमाली। ल्हेयेत आ:थें

उबलय् थी थी कथंया साधान मद्दु। कुबिया हे ल्हेयमा:। बालि यक्व सल धायेवं जिवं जिउ मजुइक ल्हेये माली। मल्हेला धा:सा स्यनावनीया धन्दा जुइ। थज्यावलय् नये त्वनेया तकं था:गा दइमखु।

भवाला पालां वा वया: लें चुलुया च्वनी। चुलुगु लैय् भचा जक होसियार ी जुइ मफुत धायेवं दया: धा:पा: नं जुइफु। अथेहे नये त्वनेया था:गा: मदइगु व ज्यां न्यलाच्वनीगु अवस्थाय् वां दाइवलय् उसायें मदःगु यक्व सम्भावना दइ।

असारया बखत धयागु वापीगु बखत खः। दछियंके नये मा:गुलिं थ्वयात मू बालि कथं कयातःगु दु। थ्व ज्या यायवलय् मनु सीसां अथे तया: थज्यानीं यायेमा: धयागु परिभाषित यानातःगु दु।

उकें थ्व ज्यायात सिनाज्या धायेगु यानातःगु धयागु लोक मान्यता दु।



पन्नारत्न महर्जन

फसि, तुसि, आलु आदि बालि यक्व सया: ल्हेये माला: म्हं मफुत धायेवं सिनाज्यायात धक्का जुइ। सुथां लाके याये फइ मखु। दछि यंके नये मा:गु अन्न बाली बांमला:गु लिचः ला:वनी। याकःमि तयेतला थज्यागु अवस्था जुल धायेवं अभिषाप हे जुयावीयः।

म्हं मफइगु धयागु बांलागु पक्ष अवश्यं मखु। मनुखं उसायं बांलाकेत थीथी धर्म कर्म यानाच्वनी। बालिहे जूसानं यक्व सया: उसायें स्यंक: वनीगु पक्षयात भिंगु शुभ चिं अवश्यं धाये मछिं। उकें हे थज्यागु बालि यक्व सल धायेवं मभिं व दसांकइ धायेगु यानातःगु खः।

नेवा: समाजय् थीथी कथं संस्कृतित दु अले थःथःगु कथंया धारणा दयेका वयाच्वंगु खने दु। संस्कृतिइ विविधता दुपिं नेवा: समाज दुने थथे याये मत्यः अथे याये मत्य धका: थीथी कथंया अन्धविश्वास ल्यनाच्वंगु दु। अज्वःगु कथंया अन्धविश्वास दुने वास्तवय् विज्ञान सुलाच्वंगु दु धका: पन्नारत्न महर्जनं क्यनादीगु दु। वय्कलं नेवा: समाज नाप स्वाका अन्धविश्वारय् लिकुनाच्वंगु विज्ञान नांगु सफू तकं च्वयादीगु खः। व हे सफूपाखें निरन्तर रुपं न्हयव्वया वयाच्वनागु खः। सं.



## यँया मौलिक नखः यँया:

श्रीकृष्ण महर्जन

स्वनिगा:या आदिवासी नेवा:तयगु सांस्कृतिक सभ्यताया केन्द्र जुया च्वंगु यँ। यँया नेवा:तयसं हनीगु थीथी कथंया नखः चखः नापं संस्कृतित मध्ये दक्ले महत्वपूर्णगु नापं दक्ले तःजिक हनीगु नखः धइगु यँया: खः। इन्द्रजात्रा, कुमारी जात्रा नं धायेगु याना वयाच्वंगु यँया:या छगू महत्वपूर्णगु पक्ष धइगु यँया: खः। यँयासिं जब हनुमानधवाखाय् थनेगु याइ अबलेनिसें यँया: सुरु जुइ। अले गुखुन्हु यँया: क्व:थलिइ उखुन्हु यँया: क्व:चाइगु खः। उकिं यँया: थनेगु धइगु यँया: सुरु जूगु संकेत खः धका: अपुक हे मनुतयसं थुइका वयाच्वंगु दु।

### यँया: थनीगुया महत्व

यँया: थनेगु धइगु यँया:या इलय् जक मेमेगु इलय् नं थनेगु याना वयाच्वंगु दु। यँया हे स्वल धा:सां नं यँया:या इलय् हे मरु सतःया अत्को नारायण चःया न्हयःने, थहिंति,



नरदेवीइ नापं थीथी थासय् चिचीहाकःगु यँया: थनेगु याना वयाच्वंगु दु।

अले उगु चिचीहाकःगु यँया:यात इन्द्र धका: नं धायेगु याना वयाच्वंगु दु। अथे हे गनं गनं ला यँया: थना मत विइगु तकं याना वयाच्वंगु दु। ख्वपय् विस्का: जात्राया इलय् नं यँया: हे थनीगु खः। स्वनिगा:या गां गामय् नं थीथी इलय् नापं यँया:या इलय् नं यँया: थनेगु याना वयाच्वंगु दु। यँया पाहां चःहेया इलय् कंग: अजिमायाथाय् नाप नापं वंघलय् तकं यँया: थनेगु याइ। अथे हे कार्तिक पुन्हिया इलय् नं वंघलय् यँया: थनेगु चलन दु। यँया:या भूवलय् हनुमानधवाखा लागाय् सायमितयसं थनीगु यँया:यात राज्यं मान्यता बियातःगु खने दु। उकिं थुगु यँया:यात तसकं महत्व बियातःगु दु। तत्कालन जुजुपिनिगु प्रतिक कथं खड्ग ज्वना यँया: का:वनेमा:गु अले यँया:सिं धकेमा:गु चलन आ: तक नं दु। यँया: थनीगुया अर्थ छुं नं कथंया उत्सव सुरु जूगुया संकेत विइगु नितिं खः।

### यँया:या ऐतिहासिक पक्ष

यँया:या भूवलय् यँया:सिं का:वनेगु चलन तत्कालिन जुजु पृथ्वी नारायण शाहया काय् प्रतापसिंह शाहया इलनिसें सुरु जूगु खः। भाषा वंशावली नापं थीथी वंशावलीइ तकं यँया:या भूवलय् यँया: थनेगु सुरु जूगु खः धका: न्हयथनातःगु दु। उकिं यँया:या भूवलय् हनुमानधवाखाय् यँया:सिं थनेगु ज्या मल्लकाल धुंका: सुरु जूगु खः धका: धायेफइगु अवस्था दु।



### यँया:या अर्थ

यँया:सिं धइगु छु खः धइगु विषययात कया मनुतयसं थीथी कथंया तर्क तयेगु याना वयाच्वंगु दु। यँया:सिं धइगु यँया:सिं अर्थात थःत यँया:सिं धायेगु याना वयाच्वंगु दु। अले गुलिं गुलिसिनं यँया:सिं गुं हइगु सिमा जुया हे यँया:सिं धायेगु याना वयाच्वंगु खः धाइ। थ्व हे भूवलय् यँया:सिं धइगु बास्तवय् यमसि जुया यँया:सिं जूगु खः धाईपिं नं मद्दुगु मखु। यम धइगु नेवा:भासं इन्द्र खः धाइ। अले इन्द्र नाप स्वापू दुगु सि जुया हे यँया:सिं धा:गु धइ। इन्द्रयात यम चः धाइगु जुया गनं गनं यमचः नं धायेगु याना वयाच्वंगु दु। अले येमा:चः नं धायेगु याना वयाच्वंगु दु।

### यँया:सिं गू पुजा

यँया:या नितिं यँया:सिं का:वनीगु थाय् धइगु ख्वप जिल्ला दुने ला:गु नालाया यँया:सिं गू खः। यँया:सिं गूइ दूय दसं यँया:सायमित पुजा वनीगु चलन दु। शिवरात्रीया जःखः लाका: अन पूजा वनीगु खः। यँया:सिं हःगु इलय् ध्यनातःगु सिमाया कचा नापं ज्वना वना अन पुजा यायेगु नापं होम यायेगुयात हे

यँया:सिं गू पुजा वनीगु धका: धाइगु खः। उगु इलय् अन च्वना सायमितय् समेवजि तकं नयेमा:गु चलन दु।

### यँया:सिं का: वनीगु

यँया:या नितिं दूय दसं यँया:सिं गूइ वना यँया:सिं का:वने न्हयः दक्ले न्हापां गंलाश्व दुतिया खुन्हु साइट स्वया यँया:सायमित हनुमानधवाखाया नासः चः दुगु चुक्य वनेमा:गु चलन दु। यँया:सिं का:वनीपिन्त हनुमानधवाखाया पुजारीं बेतलिं चिका सिन्हः तिका सगं विइगु याइ। उगु इलय् गुजुया पल्टनयात तकं विधाई यायेगु चलन दु।

अथे यँया:सिं का:वनेगु नितिं विशेष प्रकार या खड्ग गुगु खड्गयात तत्कालिन जुजुया प्रतिक कथं ज्वना वनेमा:गु चलन दु। अर्नालि यँया:सिं का:वनीपिं सायमित नापनापं गुरुजुया पल्टन नालाया यँया:सिं गूइ वन। अन गूइ च्वंगु फल्वाय् च्वना समे नयेमा:गु चलन दु। अले यँया:सिं दयेकेगु नितिं सिमा मालेगु सुरु जुइ। निपा: ल्हातं ज्वने मफुगु, तप्यंगु नापं स्वीप्यकु हाकःगु सिमा ल्ययेगु ज्या जुइ। अथे सिमा ल्यये धुंका: उगु सिमायात पुजा याइ। पुजाया भूवलय्

हाकूमह दुगु छम्ह तकं बलि विइमा:गु चलन दु। अथे जीव बलि विइ धुंका: सिमायात लूपा व वहःपां पालेगु भाय् यायेमा:गु चलन दु। अथे लूपा व वहःपां पाले धुंका: जक मेगु पां सिमा पालेगु याइ। सिमा पालीगु इलय् गुरुजुया पल्टनपाखें टोप तयेमा:गु चलन दु। अथे यँया:सिं दयेकेगुनितिं सल्लाम्हा पाले धुंका: साला: यंके न्हयः पुजा यायेगु नाप नापं गुरुजुया पल्टनपाखें टोप तयेमा:गु चलन दु। अनं लिपा यँया:सिं साला: यंकेगु याइ। साला यंकेगु भूवलय् ख्वप जुया थिभि जुया यँया:सिं हयेगु याइ। यँया:सिं साला हयेगु नितिं न्हापा न्हापा जूसा स्थानीय सायमित नाप नापं मेमेपिन्सं तकं साला हयेगु याइ। साला: हया जब यँया:सिं पुलांगु शहर अर्थात यँया: देशय् दुत हयेगु थाय् भोताहिंतिइ थ्यनेवं नं गुरुजुया पल्टनपाखें टोप तयेमा:गु चलन दु।



साहित्य  
चिनाखं

छतपते जुया नुगः जक खोयका  
न्त्याबले ग्या चिकु थें जुई मजिलु न्हि  
भी नेवा:तेत देभं पितनेगु स्वसा स्वयाचोन सरकारं  
याकनं नेवा:तेसं न्त्यलं चायके माल न्हि ।

## अधिकार



नाति महर्जन  
द्यःचपा, पांगा

नेवा:तेगु वस्ति जक लेया लेया इमिसं  
लं तवाला यायेत छें थुना चोंगु खँला छि  
बैक्या ऋण पुले हे मलावँ छेंथुना विया  
हर्त अत्याक जुया मनूत सिनाचोंगु खँ न्योला छि  
सहरे लं तवाला यायगु बहाना याना  
न्हूगु छेंत हे थुना हःगु स्यूला छि  
गामे गामे नं ज्यापुते बुँ दथुँ दथुँ  
तव्यागु लं देका हयाचोंगु खँला छि  
थुमिसं थथे लं दयकु दयकु छेंथुना भीत  
सहर पितना छोइतिनि न्ही  
गामेनं ज्यापुते हिरा सैगु बुँ अधिकरन यायाँ  
फोगिं याना पितना छोइतिनि न्हि ॥  
आहे भीसं थुकेया विरोध मयात धा:सा  
भी नेवा:त नेपालं पलायन जुई मालीतिनी  
थःगु जन्मभूमि मेपिन्सं राजयागु स्वया  
नुग दाया खोया बने मालितीनी ॥  
थःगु जन्मभूमि पितंका चोने मालकि  
नेवा: धका गौरव यायेथाय मदयावनी  
नेवा: धका गौरव यायेथाय मंतकि  
नेवा: धका: म्वानाचोनेया छु सार दनि  
नेतातेगु हक अधिकारया लागि  
याकनं हे ल्वावने फयकेमाल न्हि  
भी आदिवासी धा:पिं दको छपं जुया  
थः पिनिगु अधिकार आ:हे कायमाल न्हि ॥  
थःगु अधिकारया लागि ल्वायत भीसं  
ज्यान पाय मा:साँ पायमाल नि  
इमिसं यायाथें अत्याचार याका भीसं  
सोभा धायवँ सहाय फेमखुनि ॥

## रचना श्रेष्ठ नेपाल मानव अधिकार संगठन किपूया नायो जुयादिल

ज्वजलपा वा:पौ /

नेपाल अधिकार संगठन किपू कचाया  
वंगु दैय २०७२ फागुन ८ गते जूगु  
न्हयक्वःगु साधारण सभाय सुयात नायः  
यायेगु धइगु खँय वःगु विवाद ज्यके मफया  
ज्यासना पुचः मत्यःसे साधारण सभा  
क्वचायेका छवल ।  
वंगु साउन १ गते ने.मा.अ.संगठन किपू  
शाखाया संस्थापक नायः व सल्लाहकार  
बाबुराम महर्जनयात ज्यासना पुचः  
दयेकेगु अधिकार प्रत्यायोजन यानाहःगु  
कथं वयकलं वंगु भाद्र २१ गते छगू  
भेला याना ज्यासना पुचःया ल्यज्या  
क्वचायेका दिल ।  
गुगु ल्यज्या संचारकःमि रचना श्रेष्ठ  
नायः, बच्चुराम श्रेष्ठ न्वकू, केसव  
अधिकारी छयाञ्जे, सुनिल मालाकार ल्यू  
छयाञ्जे, दांभरिं राजकुमार महर्जन,  
दुजःपिं विरेन्द्र शाक्य, अम्बिका श्रेष्ठ,  
हिरानानी महर्जन, रुपेन्द्र महर्जन, विरेन्द्र  
श्रेष्ठ व जानकी श्रेष्ठपिं निर्विरोध निर्वाचित  
जुयादीगु खः ।



तपाईको टोलमा भएका घटना कीर्तिपुरको समाचार बनाउने  
हो भने तपाई एक कल फोन गर्नुस् हामी तपाईको टोलको  
समाचार कीर्तिपुरको समाचार बनाईदिनेछौं

## कीर्तिपुरको चित्रण



किपुलिं पिदनाच्वंगु कीर्तिपुर सन्देश वा:पौ व ज्वजलपा: वा:पौया ग्राहक जुइगु नितिं स्वापू तयादिसँ

कार्यालय: निखासी टोल: कीर्तिपुर नपा-३  
फोन नं.: ४३३३००७, ९८४१४०१०७७

ज्वजलपा वा:पतिइ छिगू चिनाखं/बाखं/हाइकू विज्ञापन  
व मेमेगु च्वसू पिथनेगु जूसा जिमित स्वापू तयादिसँ

सकलसिगु मंका: सः



## ज्वजलपा वा:पौ

ज्याकू: निखासी त्वा: किपू नपा-३ फोन ल्या: ४३३३००७,  
९८०८६२६४२० ई-मेल : kirtipur\_sandesh@live.com



सफू दइगु थाय् १) ख्वपया च्याम्हसिंहया स्टेसनरी पसः (श्याम सुन्दरया पसः), २) ख्वप कमल विनायकया  
स्टेशनरी पसः, ३) किपूया सतःक्वया स्टेसनरी पसः, ४) किपूया देय् पुगूया बाघभैरव स्टेसनरी पसः, ५) किपूया पांगा  
दोवाटोया किपू बूक प्वाइट, ६) येंया भोताहिति नातिबज्रया पसः,  
७) येंया कुलाभुलिइ च्वंगु मंका: धुकू पसः,  
८) यल, यल ध्वाखा अर्जुन स्टेसनरी पसः,  
९) स्वापू नितिं मेमेगु फोन नम्बर: ४३३४०१३, ९८४१७२५८३, ९८४६०४६१२३९

मू  
सच्छि तका जक (१००/-)

## किपूया गथु प्याखं (गं मखा:गु प्याखं)

सफू बजारय् पिदने धुकूगु दु  
थःगु प्रति सुरक्षित यानादिसँ

## सफुतिइ दुने

- १) गथु समुदायया इतिहासनिसें वर्तमान तक
- २) गथु प्याखनय् दुथ्यानाच्वंगु तान्त्रिक व बैदिक दर्शन
- ३) नासः द्यःयात किसिलिं छाय् तइगु खः ?
- ४) किपूया गथु प्याखनय् दुथ्यानाच्वंगु थीथी पक्ष
- ५) गथु प्याखंया थीथी नां
- ६) किपूया स्वा:पा: प्याखं मध्ये गथु प्याखं नापं मेमेगु